

Na osnovu člana 4.7 Zakona o prijenosu, regulatoru i operateru sistema električne energije u Bosni i Hercegovini ("Službeni glasnik BiH", br. 7/02 i 13/03) i člana 13. Statuta Državne regulatorne komisije za električnu energiju ("Službeni glasnik BiH", broj 41/03), na sjednici Državne regulatorne komisije za električnu energiju, održanoj 10. novembra 2004. godine, donijeta su

ARBITRAŽNA PRAVILA

Opšta odredba

Član 1.

Ovim pravilima uređuje se osnovni okvir arbitražnog postupka u slučaju definisanim ovim pravilima, broj arbitara, način imenovanja, izuzeće i zamjena arbitara, nastanak arbitražnog postupka, osnovna procedura vođenja arbitražnog postupka, obustava postupka, forma i dještvo odluke arbitra i druga pitanja od značaja u arbitražnom procesu.

Primjena

Član 2.

Ova pravila primjenjuju se u svim arbitražnim postupcima koji su pokrenuti radi nemogućnosti donošenja jednoglasne odluke Državne regulatorne komisije za električnu energiju (DERK/Komisija) u pitanjima iz djelokruga rada DERK-a u skladu sa članom 4.3 Zakona o prijenosu, regulatoru i operateru sistema električne energije u Bosni i Hercegovini.

Pravila arbitražnog postupka će se primjenjivati u situacijama kada se članovi Komisije ne mogu dogovoriti da odlože pitanje o kojem se nisu jednoglasno dogovorili za 14 dana ili nisu u mogućnosti da postignu jednoglasnu odluku u periodu od 14 dana odgode u skladu sa članom 33. Poslovnika o radu DERK-a.

Obavijest

Član 3.

U svrhu ovih pravila, svaka obavijest, uključujući i objavu, saopštenje, izjavu ili prijedlog smatraju se zaprimljenim ukoliko su lično dostavljeni ili ukoliko su upućeni u sjedište DERK-a. Obavijest će se smatrati zaprimljenom na dan prijema.

Početak arbitražnog postupka

Član 4.

Arbitražni proces počinje kada predsjedavajući Komisije saopšti u pisanoj formi drugim članovima Komisije da Komisija nije bila u mogućnosti postići jednoglasan sporazum o pitanju iz nadležnosti DERK-a.

Predsjedavajući Komisije će na dan saopštenja iz prethodnog stava sačiniti pisanu obavijest o arbitraži i naložiti da se ista unese u Opšti protokol DERK-a. Obavijest o arbitraži sadrži izjavu da članovi Komisije nisu uspjeli donijeti jednoglasnu odluku o određenom pitanju sa naznakom prirode odluke koja se upućuje na arbitražu kao i procjenom vremenskog roka u kojem bi se arbitražni postupak imao okončati.

DERK će objaviti kratko saopštenje za javnost u kome se sumira potreba za rješavanje spornog pitanja u arbitražnom postupku i navodi očekivani rok za donošenje arbitražne odluke.

Broj arbitara i njihovo imenovanje

Član 5.

Samo jedan međunarodni arbitar se imenuje automatski po redoslijedu sa liste koja sadrži imena tri do pet lica koja posjeduju značajno iskustvo i profesionalnu sposobnost u oblasti energetskog sektora i tržišta, koji posjeduju iskustvo u razrješavanju sporova, i kojima se može povjeriti donošenje poštenih i nepristrasnih arbitražnih odluka.

Listu arbitara sastavljaju članovi Komisije i utvrđuju je prije upućivanja određenog pitanja na arbitražu. U slučaju da se članovi Komisije ne mogu dogovoriti o listi arbitara, predsjedavajući Komisije će zahtijevati od Vijeća ministara Bosne i Hercegovine da upotpuni listu arbitara.

Arbitri se imenuju po strogo utvrđenom rotirajućem redoslijedu, kompletirajući listu prije reizbora arbitra, izuzev u slučaju kada se članovi Komisije jednoglasno dogovore da je potrebno izabrati određenog arbitra.

Lista arbitara se ažurira najmanje svake tri godine.

Izuzeće arbitra

Član 6.

Imenovani arbitar se može izuzeti ukoliko postoje okolnosti i jasni dokazi koji dovode u sumnju nepristrasnost ili nezavisnost arbitra.

Član Komisije koji namjerava da zatraži izuzeće u pisanoj formi obavještava druge članove Komisije i arbitra čije se izuzeće traži, u roku od pet dana nakon imenovanja arbitra. Obavijest će biti u pisanoj formi i sadržavat će razloge za izuzeće.

Članovi Komisije će pokušati riješiti pitanje izuzeća kao i utvrditi razloge na kojima je zahtjev za izuzeće utemeljen. Ukoliko to ne budu u mogućnosti, članovi Komisije će većinom glasova odlučiti o prihvatanju ili odbacivanju izuzeća u roku od pet dana od dana prijema pisanog zahtjeva za izuzeće.

Ukoliko članovi Komisije prihvate izuzeće arbitra, sporno pitanje će biti upućeno slijedećem arbitru sa prethodno utvrđene liste u roku od pet dana od dana prispjeća pisanog zahtjeva za izuzeće od strane ostalih članova Komisije.

Zamjena arbitra

Član 7.

U slučaju da se prije početka ili u toku postupka arbitraže utvrdi da arbitar nije nepristrasan ili nezavisan kao što je to navedeno u članu 6. ovih pravila, imenovat će se arbitar koji će ga zamijeniti.

U slučaju smrti ili u slučaju podnošenja ostavke na mjesto arbitra u toku arbitražnog postupka, imenovat će se arbitar koji će ga zamijeniti ili će se izabrati u skladu sa postupkom predviđenim ovim pravilima.

U slučaju da arbitar ne obavlja svoju dužnost, primijenit će se postupak iz čl. 6. i 7. ovih pravila predviđen za izuzeće i zamjenu arbitra.

Ponavljanje rasprava u slučaju zamjene arbitra

Član 8.

Ukoliko je došlo do zamjene arbitra, novi arbitar će, po svojoj procjeni, odlučiti da li je potrebno ponoviti prethodno održane rasprave.

Provođenje arbitražnog postupka

Član 9.

U skladu sa ovim pravilima arbitar može voditi arbitražni postupak na način za koji on smatra da je odgovarajući, pod uslovom da se pozicije članova Komisije tretiraju jednako i pošteno.

Arbitražni postupak će se provoditi isključivo na osnovu dokumenata i drugih materijala koji su dio dokumentacije nastale unutar DERK-a.

Mjesto održavanja arbitražnog postupka

Član 10.

Mjesto održavanja arbitražnog postupka bit će sjedište DERK-a ili bilo koje drugo mjesto koje odrede članovi Komisije.

Izjava o stavu

Član 11.

U okviru vremenskog perioda koji odredi arbitar, svaki član Komisije će dostaviti arbitru izjavu o svom stavu.

Izjava o stavu će sadržavati: (a) ime i prezime člana Komisije, (b) činjenice na kojima zasniva svoj stav i (c) sporna pitanja.

Povratna izjava (odgovor)

Član 12.

U roku koji utvrdi arbitar, svaki član Komisije može uputiti drugim članovima Komisije i arbitru odgovor na izjavu o stavu.

Odgovorom na izjavu o stavu posebno se odgovara na pojedinosti iz tač. (b) i (c) izjave o stavu.

Arbitar može odlučiti da li će, pored izjave o stavu i odgovora na tu izjavu, zatražiti od članova Komisije i neke druge izjave i utvrdit će rok za dostavljanje takvih izjava.

Pomoć

Član 13.

Članovi Komisije mogu imati pomoć prilikom njihovog učešća u bilo kojem arbitražnom postupku koji se vodi u skladu sa ovim pravilima.

Predsjedavajući Komisije će, uz saglasnost druga dva člana Komisije, imenovati jednog ili više zaposlenika DERK-a za pružanje pomoći članovima Komisije i arbitru. Svi zaposlenici će pružati pomoć svim članovima Komisije i arbitru kako bi se bolje uspostavila saradnja između članova Komisije i osoblja DERK-a u postizanju što kvalitetnijeg rješenja za nerazriješen slučaj. Niti jedan član Komisije ne može prihvatiti pomoć od bilo kojeg lica osim zaposlenika koji je prethodno imenovan.

Rokovi

Član 14.

Vremenski rokovi koje utvrdi arbitar za dostavljanje izjava, uključujući izjavu o stavu i odgovor na izjavu o stavu, ne bi trebali biti duži od deset dana. Međutim, arbitar može produžiti ove rokove ukoliko sam zaključi da je to opravdano.

Propust u izvršenju radnje

Član 15.

Ukoliko u vremenskom periodu koji je odredio arbitar, bilo koji član Komisije ne dostavi svoju izjavu o stavu i odgovor na tu izjavu bez jasnog obrazloženja za takav propust, arbitar može donijeti odluku na osnovu dokaza kojima već raspolaže.

Forma i dještvo odluke

Član 16.

Odluka arbitra će biti potkrijepljena činjenicama, zaključcima u skladu sa zakonom i odlukom zasnovanom na podacima DERK-a. Arbitar se ne može pozvati niti na jedan dokaz ili materijal koji je van dokumentacije koja je dostavljena u svrhu arbitražnog postupka.

Arbitražna odluka će biti u pisanoj formi, potpisana od strane arbitra i bit će konačna te kao takva obavezujuća za DERK.

Arbitar će navesti razloge na osnovu koji je odluka donesena.

Odluka o arbitraži će biti uvedena u Opšti protokol DERK-a.

Odluka o arbitraži će biti objavljena u "Službenom glasniku BiH" i službenim glasilima entiteta.

Sporazum ili obustava arbitražnog postupka

Član 17.

Arbitražni postupak će se obustaviti ukoliko se članovi Komisije jednoglasno dogovore o rješenju predmeta arbitražnog postupka prije nego arbitar donese svoju odluku.

Arbitar će ili donijeti rješenje o obustavi arbitražnog postupka ili će se, ako je tako zahtijevano od strane članova Komisije i prihvaćeno od strane arbitra, okončanje procesa zabilježiti u formi odluke o arbitraži po usklađenim pitanjima. Arbitar će biti obavezan da navede razloge po kojima je takva odluka donijeta.

Troškovi

Član 18.

Troškovi potrebni za provedbu arbitražnog postupka, bit će nadoknađeni iz budžeta DERK-a.

Stupanje na snagu

Član 19.

Ova pravila stupaju na snagu osmog dana od dana objavljivanja u "Službenom glasniku BiH".

Broj: 110/04
10. novembra 2004. godine
Tuzla

Predsjedavajući Komisije
Mirsad Salkić